


TEZAUUR LITURGIC

24 IANUARIE

**ACATISTUL
SF. CUVIOASE
XENIA
GRIGORIEVNA
DE LA
ST. PETERSBURG
IV**



MOSCOVA, 2000



Ака́фист

святе́й блаже́нней

Ксе́нии Петербу́ржстей

Кондак 1

Избранней Богом от жен Российских и призванной на служение Ему во граде святого Петра, скорой помощнице и молитвеннице нашей, похвальная пения приносим ти, святая блаженная Ксение, любовью чтуще подвиги, терпение и многострадание твоя. Ты же, яко имущая велие дерзновение ко Господу, молися, да избавит ны от всяких бед и скорбей, зовущия:

Радуйся, святая блаженная Ксение, скорая помощнице всем с верою и любовью к тебе притекающим.

Икос 1

Ангелов Творец избра ты, блаженная, в век уныния и оскудения веры, да тесным и скорбным путем шествующи, победиши страсти мира сего и вслед тебе возсияет радостью и любовью земля наша, и многая чада ея да внидут в Царство Небесное. Мы же, зряще твое дивное богоугодное житие, со благоговением и радостью зываем сие:

Радуйся, благодатию Святаго Духа осиянная;
радуйся, всем женам Российским похвало и
радосте.

Радуйся, блаженная, ангельским житием на
земли просиявшая;
радуйся, Богом от рождения на служение
страждущим избранная.

Радуйся, от юности Христа возлюбившая и Тому
от души поработавшая;
радуйся, верная рабо Господня.

Радуйся, града святаго Петра и всея земли
Российския сокровище пребогатое;
радуйся, яко тебе славит весь мир
христианский.

Радуйся, от глада духовнаго всех нас
избавляющая;

радуйся, заповеди Божественныя творити
научающая.

Радуйся, в православней вере нас
укрепляющая;

радуйся, радости земли нашея.

Радуйся, святая блаженная Ксение, скорая
помощнице всем с верою и любовью к тебе
притекающим.

Кондак 2

Видя Господь чистоту сердца твоего, зане от
юности пожила еси в благочестии и хранении
заповедей Божиих, благоволи ти сочетатися

браком законным и в супружестве целомудренне и богоугодне пожити. Егда же супруг твой Андрей внезапно умре, презрела еси суету земнаго счастья, отреклася еси от всех прелестей земных и возносила еси молитвы своя к Богу, со умилением поющи Ему: Аллилуиа.

Икос 2

Разумела еси, богомудрая Ксение, яко едино есть на потребу человеком, еже благоугождати Господеви. Сего ради, свободу получивши от брака Божиим смотрением, Христу обручилась еси и Тому Единому возжелала еси поработати усердно, яко верная раба Господня. Мы же, почитающе тя с любовью, поем таковая: Радуйся, с супругом твоим во всяком благочестии и чистоте пожившая; радуйся, умом и сердцем к Богу Живому возлетевшая.

Радуйся, богомудрей ользе поревновавшая; радуйся, Духом Святым умудренная во спасение.

Радуйся, возлюбившая Бога паче всех земных благ;

радуйся, земныя радости ни во чтоже вменившая.

Радуйся, чистотою жития святым подражавшая;

радуйся, многих святых добродетели в себе

совокупившая.

Радуйся, в учении и премудрости нас
наставляющая;

радуйся, любовью нас согревающая.

Радуйся, жизни по заповедям Божиим нас
научающая;

радуйся, в мире живущих ко спасению
путеводительнице.

Радуйся, святая блаженная Ксение, скорая
помощнице всем с верою и любовью к тебе
притекающим.

Кондак 3

Силою благодати Божия укрепляема, Ксение
блаженная, восхотела еси и оставить дом твой
подвига ради иноческого равноангельного
жития. Сродници твои убеждаху тя отступить от
желания сего, надеявшеся устроить брак твой с
земным женихом. Ты же от брака уклонилася
еси, да Единому Небесному Жениху
поработаеши, поющи Ему: Аллилуиа.

Икос 3

Имуще огонь любви ко Христу, блаженная,
возносила еси молитвы ко Господу и Его
Пречистой Матери, умоляючи открыть тебе,
како возможеши послужити Богу, шествующи
царским путем Креста Господня. Темже
ублажающе тя, вопием ти таковая:

Радуйся, яко в любви к Богу и Его Пречистей Матери обрела еси радость и утешение; радуйся, образ любви и чистоты в себе показавшая.

Радуйся, разум просветившая молитвою; радуйся, и нас во спасение умудряющая.

Радуйся, блуждающих во мраке неверия на путь спасения направляющая;

радуйся, намерение следовати путем тесным в нас укрепляющая.

Радуйся, окамененная сердца наша радостию и любовью обновляющая;

радуйся, мглу сомнений наших рассеивающая.

Радуйся, смирению и кротости Божия Матере подражавшая;

радуйся, крест Христов с терпением и радостию понесшая.

Радуйся, о спасении грешников к Богу и Богородице теплая ходатаице;

радуйся, светильниче многосветлый граду святого Петра.

Радуйся, святая блаженная Ксение, скорая помощнице всем с верою и любовью к тебе притекающим.

Кондак 4

Бурю искушений воздвигоша ближнии противу тебе, блаженная, видевши жажду твою послужити Богу в чистоте и правде. Ты же,

радости наученная от Божия Матере,
препобедила еси вся силою благодати Божия,
укреплявши веру в Господа хождением в храм,
умиленными молитвами; ныне же с лики
победивших мир воспеваеши Христу Богу:
Аллилуиа.

Икос 4

Слышав Господь Свою агницу, посла ти во сне
преподобную Марию Египетскую, да откроет
волю Божию: оставивши дом твой, последовати
за Христом, носящи Его поругание и поношение,
терпящи напасти, лишения и велия скорби.

Дивящися о таковом промысле Божиим,
воспеваем ти сие:

Радуйся, все житие твое всесовершенно Богу
предавшая;

радуйся, житием твоим суету мира сего
обличившая.

Радуйся, яко молитвы твоя услышаны быша
Богом;

радуйся, яко сподобилася еси и увидети во сне
преподобную Марию Египетскую.

Радуйся, в церкви дни и нощи молитвенно
проводившая;

радуйся, сердцем умиленным Бога познавшая.

Радуйся, верою и любовью сердца наша
просвещающая;

радуйся, ищущим пути ко спасению наставнице

благодатная.

Радуйся, молитвами вся искушения
победившая;

радуйся, яко житием твоим исполнила еси вся
повеленная тебе от Господа.

Радуйся, на подвиг самоотвержения Христа
ради нас призывающая;

радуйся, паче сияния солнечного землю нашу
любовию озарившая.

Радуйся, святая блаженная Ксение, скорая
помощнице всем с верою и любовию к тебе
притекающим.

Кондак 5

яко звезда всесветлая возсияла еси в Российской
земли, блаженная, егда Христа ради волею
оставивши дом, родных и близких, и вся
красная мира сего возненавидевши, Бога же
Единого возлюбивши, последовала еси Ему по
заповеди: «аще кто хочет по Мне идти, да
отвержется себе, и возмет крест свой, и по Мне
грядет», поющи Ему: Аллилуиа.

Икос 5

Видевше тя людие богоспасаемого града святого
Петра яко странну, в мужестей одежде ходящу и
Андреем называющуюся, дивляхуся. Ты же,
блаженная, со апостолом Павлом рекла еси: «Мы
буи Христа ради, вы же мудри о Христе», подвиг

многотрудный восприяла еси, образ юродства и неразумия пред людьми являючи, разум же совершен имущи, в смирении от него отреклася еси, в сем подвиге до смерти пребываючи.

Темже поем ти сице:

Радуйся, буйственное и юродственное жительство избравшая;

радуйся, блаженному Андрею Христа ради юродивому в подвигех подражавшая.

Радуйся, Христа Единого и Его Пречистую Матерь всем сердцем возлюбившая;

радуйся, вся благая мира сего презревшая.

Радуйся, поношения и укорения Христа ради претерпевшая;

радуйся, славу человеку ни во чтоже вменившая.

Радуйся, образе нищеты духовныя;

радуйся, от суеты мирския нас ограждающая.

Радуйся, юродством глубины премудрости достигшая;

радуйся, в тайне Богу послужившая.

Радуйся, в житии твоём непобедимое мужество показавшая;

радуйся, в терпении гонений, хулений, болезней и скорбей нас укрепляющая.

Радуйся, святая блаженная Ксение, скорая помощнице всем с верою и любовью к тебе притекающим.

Кондак 6

Проповедница Евангельския кротости, смирения и радости духовныя была еси, блаженная, дерзновенно исповедующи Христа истиннаго Бога, путь к Нему показующи любовию к людем, укрепляющи веру в малодушных, вразумляющи заблуждшия, отвращающи от греха падшия, научающи подражати тебе и смиренно сердцем и усты непрестанно Богу пети: Аллилуиа.

Икос 6

Возсия свет велий подвигов твоих, блаженная, озаряя благодатию всю Церковь Русскую Православную. Многа бо лета слышала еси от людей слова уничижения, оскорбления и обид, но молилася еси за них к Богу, да откроет сердца их к вере и благочестию и наставит на путь истины, призывающи всех к подвигу духовному во славу Господа нашего. Мы же, ведуще о благодатней силе твоей, ублажаем тя песньми таковыми:

Радуйся, терпевшая за Господа поношения и унижения;

радуйся, скорби и страдания нести нам помогающая.

Радуйся, за всех обидимых ко Господу молящаяся;

радуйся, благодатныя слезы покаяния нам

дарующая.

Радуйся, Божия избраннице, искушения мира, плоти и диавола победившая;

радуйся, от врагов видимых и невидимых нас защищающая.

Радуйся, злобу добром препобедившая;

радуйся, в мире живущим образе богоугождения.

Радуйся, нищету, лишения и болезни со упованием и радостью терпевшая;

радуйся, сего ради венец светлый от Бога стяжавшая.

Радуйся, подвижником веры во всех делах и начинаниях помогающая;

радуйся, друг друга тяготы носить нас научающая.

Радуйся, святая блаженная Ксение, скорая помощнице всем с верою и любовью к тебе притекающим.

Кондак 7

Хотя Всеблагий Господь явити в тебе, блаженная, Свое неизреченное к людям милосердие, дивных даров сподоби тя: дара прозорливости и чудотворений, дара молитвы, исцеления недугов, утешения скорбящих, да вси почитают подвиги и труды твоя, воспевающе Богу: Аллилуиа.

Икос 7

Новое чудо показа Господь, егда явилася еси, блаженная мати Ксение, во сне супруге смертельно болящего и рекла еси, яко муж ея здрав будет и имать родиться у них младенец, да нарекут имя тому Ксения, и будет она хранити семейство от всяких бед. Сице во вся дни жития твоего и доньне дарова тя Господь утешительницу страждущих и вестницу добра. Мы же, ведяще знамения силы Господни, чрез тебе явленная, поем ти таковая:

Радуйся, радость небесную от Бога приявшая; радуйся, благодатный мир и радость в дома приносящая.

Радуйся, дух мирен стяжати нам помогающая; радуйся, духовному мужеству нас научающая.

Радуйся, прозорливице, сокровенная сердец человеческих Духом Божиим прозиравшая; радуйся, дерзновение в молитвах пред Богом за страждущих обретшая.

Радуйся, одержимых страстями от гибели спасающая;

радуйся, от недуга пьянства страждущих исцеляющая.

Радуйся, тяжело болящего иноверца от смерти спасшая и к православней вере сего приведшая;

радуйся, кончину императрицы Елисаветы

Петровны в праздник Рождества Христова
предрекшая.

Радуйся, пламенной молитвою к Богу пламень
пожара угасившая;

радуйся, свеще неугасимая, в молитве пред
Богом горящая.

Радуйся, святая блаженная Ксение, скорая
помощнице всем с верою и любовью к тебе
притекающим.

Кондак 8

Странница бездомная явилася еси, Ксение
блаженная, в стольнем граде отечествия твоего,
взыскующи града Иерусалима Небеснаго. По
имени твоему тако и житие твое: ходила бо еси
по земли якоже Христос в земнем Своем житии,
не имеющи где главу подклонити. Помози и нам
в странствии нашем на многострадальной
земли, да отложивше вся суетная, к вечности
устремимся, воспевающе Богу: Аллилуиа.

Икос 8

Вся весть Господь и ничтоже есть тайно, еже не
открыется, тако и твое благоугодное житие, яко
во единой ризе лето и зиму обходила еси град
твой, голодом и жаждою томимая, безмерною
тяготою плоть твою изнуряющи и работающи
Господеви день и ночь в посте и непрестанных
молитвах за род человеческий, да обратятся вси

к Богу истинному. Темже убо и нам путь
показала еси, имже шествующе во след Христа,
Царствия Небеснаго сподобимся. Мы же,
прославляюще великия подвиги твоя, с
радостью поем:

Радуйся, странницей в мире пожившая, житием
же твоим образ служения Богу явившая;
радуйся, бездомная на земли, дом Духа Святаго
в души твоей уготовившая.

Радуйся, зной, стужу и дожди терпевшая,
одеянием же души твоея молитву непрестанную
имевшая;

радуйся, нищетою твоею нищему Лазарю
евангельскому подражавшая.

Радуйся, благодатию Духа Святаго чудесно
согреваемая;

радуйся, хлад людских сердец молитвами
твоими растопляющая.

Радуйся, созданию церкви Божия тайно
послужившая;

радуйся, на верхи церкви тоя ночью тяжкия
ноши камней носившая.

Радуйся, поклоны земныя во вся страны света в
поле творившая;

радуйся, бремя грехов людских молитвами
твоими облегчающая.

Радуйся, отвержению премудрости века сего
юродством твоим нас научающая;

радуйся, подвигом жития твоего и страданием иову многострадальному уподобившаяся. Радуйся, святая блаженная Ксение, скорая помощнице всем с верою и любовью к тебе притекающим.

Кондак 9

Всею душею твоею Бога возлюбивши, блаженная, благодать восприяла еси, недужныя целити, скорбныя утешати, от бед и напастей избавляти, заблуждшия и отчаянныя на путь спасения направляти. Мы же, таковую благодать, тебе от Бога данную, чтуще, вопием Ему: Аллилуиа.

Икос 9

Ветии многовещаннии не возмогут восхвалити дела твоя, блаженная, яко Сам Господь, желая прославити тя на земли, попусти отроку утонуть в водах невских. Ты же, видящи неутешное горе матери его, со дерзновением воздела еси руце твои ко Господу с молитвою: «Да будет жив отрок», и бысть глас с небес: «Иди и твори, яко хочещи!» Тогда пр Икосновением руки твоя оживила еси утопшаго отрока в виду матери его. Мы же за таковое дерзновение ублажаем тя песньми сими:

Радуйся, матерей скорбящих утешение;
радуйся, яко по молитвам твоим утопший отрок

воскресе.

Радуйся, от суда несправедного невинных
избавляющая;

радуйся, из темниц молитвами твоими
свобождающая.

Радуйся, девицу благочестивую от брака со
злодеем спасающая;

радуйся, закоренелых в пороках грозная
обличительнице.

Радуйся, яко царице в сонном видении
рождение чада прорекла еси;

радуйся, яко предстательством твоим семейства
христианская укрепляются.

Радуйся, недоумевающих мудрая советнице;
радуйся, судьбы Божия предвозвещающая.

Радуйся, помощь страждущим чрез добрых
людей подающая;

радуйся, светом добродетелей твоих Бога
прославившая.

Радуйся, святая блаженная Ксение, скорая
помощнице всем с верою и любовью к тебе
притекающим.

Кондак 10

Спасительного подвига ищущи, блаженная,
многоскорбное житие избрала еси любви ради
Христовы, ангельски во плоти пожила еси, мир
просвещающи чудесы многими, непрестанно
возсылающи усердно молитвы к Богу, да

помраченная сердца не познавших истины
просветятся благодатию и обратятся к познанию
Бога, Владыки и Творца своего, поюще Ему:
Аллилуиа.

Икос 10

Стена еси твердая и ограждение неодолимое
граду твоему и всей стране нашей Российской,
мати Ксение. Сподобилася бо еси видети во сне
Пресвятую Богородицу, возвестившую, яко
скоро Господь призовет тя, блаженная, в Горний
Иерусалим, а святые мощи твоя верующие
почитати будут до скончания века. Мы же,
видяще исполнение обетования сего и
благодатную помощь приходящим ко гробу
твоему, с любовью поем тебе:

Радуйся, откровения во сне о кончине своей
сподобившаяся;

радуйся, с радостию восприемшая весть о
преселении своем на Небо.

Радуйся, носившая на земли венец терновый;
радуйся, унаследовавшая на Небеси венец
небесный.

Радуйся, до конца в подвизех служения Богу
претерпевшая;

радуйся, от ангелов на Небеси радостно
сретенная.

Радуйся, течение страдальческого пути добре
скончавшая;

радуйся, на стезю заповедей Божиих нас
наставляющая.

Радуйся, светом добродетелей твоих Бога
прославившая;

радуйся, от растления мира сего верных
охраняющая.

Радуйся, праваго пути веры и благочестия
указательнице;

радуйся, всем требующим покров от Господа
подающая.

Радуйся, святая блаженная Ксение, скорая
помощнице всем с верою и любовью к тебе
притекающим.

Кондак 11

Пение молебное немолчно бысть при гробе
твоём, блаженная, от честнаго успения до дне
светлаго прославления твоего, яко гроб твой
приснотекущий источник исцелений показа
Господь во утверждение православныя веры.
Темже и Святая Церковь достойно почитает
подвиги и чудеса, тобою творимая, воспевающи
Богу: Аллилуиа.

Икос 11

Светоподательный светильник явился в
Российстей стране тобою, блаженная. Ты же
велию скорбь земли нашея провидела еси во дни
погребения во тьму народа нашего, и место

уготовала еси для исповедников веры
православныя на кладбищи Смоленском и
молитвами твоими укрепляла еси их на жертву
во спасение душ многих заблуждших, и
обетование победы даровала еси. И ныне на
иконе твоей стоиши посреде могил
новомучеников российских, призываючи и
укрепляючи нас на брань духовную противу
духов злобы поднебесных. Темже поем ти:
Радуйся, преславный светильниче Российския
земли;
радуйся, исцеления чудная от святых мощей
твоих обильно источающая.
Радуйся, житием твоим град святого Петра
освятившая;
радуйся, всем ныне живущим в нем путь ко
спасению показавшая.
Радуйся, во Отечестве Небесном
пребывающая;
радуйся, печальнице о людех русских, во
отечестве твоем земнем и в разсеянии сущих.
Радуйся, впадших в сети диавольския твоею
молитвою свободяющая;
радуйся, в годину скорбей помощь земли нашей
подающая.
Радуйся, изнемогающих от уныния и печали
скорая утешительнице;
радуйся, сердца всех верных просвещающая.

Радуйся, всех скорбящих и нуждающихся пред Богом предстательнице;
радуйся, яко заступлением твоим избавляемся от праведнаго гнева Божия.

Радуйся, святая блаженная Ксение, скорая помощнице всем с верою и любовью к тебе притекающим.

Кондак 12

Благодать прияла еси от Господа к вере истинней приводити, соблюдать от болезней и смерти духовныя всякаго человека, почитающаго тя. Возбуди и нас от сна греховнаго, лености и нерадения, озари ожесточенная сердца светом веры, да чада Бога соделаемся и в радости воспоем Ему: Аллилуиа.

Икос 12

Поюще твое прославление во святых, веруем, яко велие дерзновение и благодать пред Богом имаши. Темже молимся тебе, святая блаженная мати Ксение, молися ко Господу, да избавит страну нашу от глада, труса, потопа, меча, нашествия иноплемennых и междоусобных брани, да сохранит мир на земли. Мы же с любовью приходяще к честным мощем твоим, со умилением вопием ти сице:

Радуйся, от людей российских благоговейно прославляемая;

радуйся, яко на Небесех с сонмом святых жен
российских ныне пред Господом предстоиши.
Радуйся, преподобных и праведных
сонаследнице;

радуйся, о всем мире Божиим молитвеннице.
Радуйся, цветом нетления украшенная на
Небеси;

радуйся, в нынешнем многоскорбнем житии
всем нам помощнице теплая.

Радуйся, неизреченныя радости в мире Горнем
причастнице;

радуйся, радости той нас научающая.

Радуйся, ревность ко спасению в нас
возбуждающая;

радуйся, борющимся со страстями и похотями
помощнице неутомимая.

Радуйся, к сокрушению и покаянному плачу нас
приводящая;

радуйся, велие сокровище Российския земли.

Радуйся, святая блаженная Ксение, скорая
помощнице всем с верою и любовью к тебе
притекающим.

Кондак 13

О святая блаженная мати Ксение, прими от нас
грешных моление сие, тебе возносимое, огради
молитвами твоими град твой, отечество наше и
вся люди российския от враг видимых и
невидимых, от всяких зол, бед и напастей;

умоли Господа, да дарует нам силы нести крест наш с радостью и надеждою на спасение, воспевающе с тобою Богу: Аллилуиа.

Этот Кондак читается трижды, затем 1-й Икос «ангелов Творец...» и 1-й Кондак «Избранней Богом от жен Российских...»

ПОЛНЫЙ
АКАФИСТНИК
КАНОНИЧЕСКИЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДНИЦЕ
АРХАНГЕЛАМ
И АНГЕЛАМ

І

ИЗДАНИЕ
* 1980